

TSELÁ EA TUMELÓ

TSELA EA TUMELŌ

*Copyright by the Bechuanaland District
Committee of the
London Missionary Society in Cape Colony.*

Printed by Butler & Tanner, Frome

TSELÀ EA TUMÈLÒ

E LE

DIPOCO LE DIKARABÒ TSA CÒNA

DI NA LE

DITLHOTLHOMISHÒ


TSE DI TLHOPILWEÑ MO BIBELEÑ

KE

J. TOM BROWN

(CATECHISM)

PRINTED FOR, AND PUBLISHED BY
THE BECHUANALAND DISTRICT COMMITTEE OF THE
LONDON MISSIONARY SOCIETY



KITSISHŌ

LOKWALONYANA lo lo kwalecwe Baipobodi gore ba thusiwè go tlhaloganya tsela ea tumèlō ba cwè balatedi ba Morèna Yesu Keresete ba ba bolokegileñ.

Lo kwadilwe ka cholohèlō ea go re botlhe ba ba batlañ Modimo le boamarure kaga òna, ba tla rata go itse gotlhe mo ba ka go itseñ, me ke gôna ba tla inèlañ ka tlhōahalō go tlhotlhomisa cotlhe tse di kwadilweñ yaka moapostoloi a buile a re "Tlhotlhomisañ dilō cotlhe : chwarañ se se leñ molemō,"
I. Bathesalonika 5. 21.

Lokwalō lo lo ka thusa ba ba tlhoa hetseñ ka go ba gakolola, le go ba ruta kaga mothèo oa tumèlō, le cholohèlō ea polokō, le dichwanèlō tsa badumedi, le matshègō. Me go sholohecwe ha moñwe le moñwe, eo o ithutañ dipoco tse le dikarabō tsa côna, a tla itlhotlhomietsa dilō tse di umakilweñ, ka go botsisa mo dikwaloñ tsa Modimo ha dilō tse di ntse yaka go bolecwe.

J. TOM BROWN.

KURUMAN, 1909.

DITLHŌGŌ

		POCO	POCO
KAGA MODIMO	LE KICO	KAGA	
ONA		I go ea go	12
KAGA MOTHO		13 "	17
KAGA BOLEO		18 "	24
KAGA BOICHWARÈLŌ		25 "	26
KAGA MORÈNA YESU KERESETE		27 "	40
KAGA POLOKŌ		41 "	45
KAGA MŌEA O O BoITSHÈPŌ		46 "	50
KAGA BoITSHEPHISHŌ YOA MŌEA	51	"	55
KAGA MATSHEGŌ A BA BA DUMÈ-			
LAÑ		56 "	57
KAGA PHUTHÈGŌ		58	
KAGA MOLAŌ OA MODIMO		59 "	64
KAGA TAOLŌ EA NTLHA		65 "	73
KAGA TAOLŌ EA BOBEDI		74 "	76
KAGA TAOLŌ EA BORARO		77 "	79
KAGA TAOLŌ EA BONÈ		80 "	83
KAGA TAOLŌ EA BOTLHANO		84 "	89
KAGA TAOLŌ EA BORATARO		90 "	94
KAGA TAOLŌ EA BOŠHUPA		95 "	98
KAGA TAOLŌ EA BOHÈRA-			
MEBEDI		99 "	103
KAGA TAOLŌ EA BOHÈRA-MOÑWE	104	"	107
KAGA TAOLŌ EA LESHOMÈ	108	"	113
KAGA MEKGWA EA SECWANA	114	"	116
KAGA DITHUSHŌ TSA TSHEGOHACO	117	"	119
KAGA THAPÈLŌ	120	"	131
KAGA DIKGÖLAGANŌ	132	"	134

		POCO	POCO
KAGA KOLOBECO	.	135	go ea go
KAGA SELALÈLŌ SA MORÈNA			142
YESU KERESETE	.	143	,, , 146
KAGA DICHWANÈLŌ	.	147	,, , 151
KAGA NAMISHŌ EA TUMÈLŌ	.	152	,, , 156
KAGA BOTSHELŌ YOA TUMÈLŌ	.	157	,, , 159
BOIPOLÈLŌ YOA TUMÈLŌ	.	160	

I
Show
He
She
It

TSELA EA TUMÈLŌ

Kaga Modimo le kicō kaga Ōna.

Poco 1. Motho o chwanetse go gopo-lèlañ bogolo ?

Karabō. Motho o chwanetse go gopo-lèla bogolo Modimo, le tumèlō e o e itsi-sitseñ batho, le botshelō yo bo tlañ.

Ditlhotlhomisho. *Pes 145 ; Yohane 17. 3.*

Poco 2. Modimo o ka itsiwe kañ ?

Karabō. Modimo o ka itsiwe ka ditihō tsa ōna tse di bōnalañ, le ka pelo tsa rona, me bogolo o ka itsiwe ka Lehoko ye le boitshèpō ya ôna.

Pes 111. 2-4 ; Yer 24. 7 ; Luke 4. 4.

Poco 3. Ditihō tsa Modimo di re rutañ kaga ōna ?

Karabō. Letsatsi, le ñwedi, le dinalledi di tlhōmamisa ha Modimo o le mogolo, me diyō le diaparō tse o di re neileñ di shupa ha o le molemō.

Pes 19. 1 ; Pes 34. 8 ; Ditihō 14. 17.

Poco 4. Lehoko ya Modimo ke eñ ?

Karabō. Lehoko ya Modimo ke thatō ea òna e o e senoletseñ baperofeti, le baaposetoloi, le batho ba bañwe ba ba siameñ, ka tlhotlheleco ea Mōea o o boitshèpō, me bôna ba kwala dikwalō tsa Bibele.

Bahebera 1. 1 ; 2 Timo 3. 16.

Poco 5. Re ka itse ka eñ ha Bibele e le Lehoko ya Modimo ?

Karabō. Re ka itse ha Bibele e le Lehoko ya Modimo ka botlhale yoā dithutō tsa gagwe, le boitshèpō, le ka mauñō a a uñwañ ke batho ba ba inèlañ mo go côna.

Baroma 1. 2 ; Baroma 7. 12 ; Yakobo 1. 22.

Poco 6. Bibele o re senolèlañ kaga Modimo ?

Karabō. Bibele o re senolèla Modimo ha o le Rara eo o re ratileñ, le Morwa eo o re shwetseñ, le Mōea o o boitshèpō o o re itshepisañ.

Luke 10. 21-22 ; Yohane 14. 11 le 26.

Poco 7. Re chwanetse go bala Bibele leñ le yañ ?

Karabō.—Re chwanetse go bala Bibele ka malatsi aotlhe ka boiketlō, re lopile

Modimo go re thusa go utlwa, le go tlhanganya mo go balwañ. Re chwanetse go rapèla go re Mōea o o boitshèpō o re rutè mo go rèwañ ke dithutō tsa Bibele, le go re pelo tsa rona e nè tse di ratañ go tsamaea kaha ditaõn tsa gagwê.

Yohane 8. 31 *le* 32; *Yoh.* 16. 13-15; *Yakobo* 1. 5.

Poco 8. Bibele o ruta go re Modimo ke eñ?

Karabō. Bibele o ruta go re Modimo ke mōea, ga se oa nama le madi yaka rona. Ebile ke mōea o o senañ tshimologō, leha e le bokhutlō : O boitshèpō : O tshiamō : O tletse botlhale : me o pelo-tlhomogi le loratō lo logolo.

Yohane 4. 24; *Pes* 90. 2; *Isaia* 6. 3; *Baroma* II. 33; *Yoh.* 3. 16.

Poco 9. Go rèwañ ha go twe Modimo ke mōea?

Karabō. Ha go twe Modimo ke mōea go rèwa go re Modimo o tshedile, o itse dilō cotlhe, o diha mo nttheñ cotlhe, leha rona batho re retelèlwa go o bôna.

Baroma 14. II; *Yeremia* 17. 9-10; *Yohane* 1. 18.

Poco 10. Go rèwañ ha re re Modimo o boitshèpō?

Karabō. Ha re re Modimo o boitshèpō

re raea go re ūna tōta o itekanetse ka botlalō mo boitshekoñ yoa ūna, le go re o rata señwe le señwe se se siameñ, le se se molemō, me o ila ka tlhōō e kgolo dilō cotlhe le ditihō cotlhe tse e leñ tsa boleo.

Mat. 5. 48 ; Pes 11. 7 ; Sekaria 8. 16-17.

Poco 11. Modimo o shupile ha o re ratile ka eñ ?

Karabō. Modimo o shupile ha o re ratile ka go re bopa, le go re tlamèla, le ka matshègō le mautlwèlō-botlhoko a o a re naeañ ka letsatsi le letsatsi.

Genese 1. 26-30 ; Pes 103. 2-4 ; Yohane 3. 16.

Poco 12. A go Modimo o moñwe hèla ?

Karabō. Go Modimo o moñwe hèla. Medimo ea dichaba ke dibopiwa tsa batho hèla, me ga e na go nna gopè.

Deuteronomie 6. 4 ; Pes 115. 4-8.

Kaga Motho

Poco 13. Motho ke eñ, me o bopilwe ka eñ ?

Karabō. Motho ke sebopiwa se segolo sa Modimo, me o bopegile e le mmele o o

bopilweñ ka nama le madi, o o tla shwañ ;
me e bile e le mōea o o tla nnañ o tshela
leha mmele o shule.

Genese 1. 26 ; Gen. 2. 7 ; Moreri 12. 7.

Poco 14. Motho o itse kañ ha a na le
mōea ?

Karabō. Motho o itse ha a na le mōea
ka a lemogile ha go na le mo go èna mo
go gopolañ, le mo go itseñ go harolo-
ganya tshiamō le tshiamololō, me mmele
ga o kake oa diha yalo.

I Bakorintha 2. 11 ; I Yohane 5. 20.

Poco 15. Motho o chwanologa le
dibopiwa tse diñwe tse di tshedileñ ka
eñ ?

Karabō. Motho o chwanologa le dibo-
piwa tse diñwe tse di tshedileñ ka cōna
di hèla ka mmele, me ga di na meōea e
di ka itseñ Modimo ka eōna, me leha di
ka lemoga, di harologanya, ekete ga di
itse di na le thata euō.

Pes' 49. 20 ; Yoba 35. 11.

Poco 16. Erile batho ba ntlha ba
bopiwa ba bo ba le mo popegoñ e e ntseñ
yañ ?

Karabō. Erile batho ba ntlha ba
bopiwa ba bo ba le mo popegoñ ea go

tlhōka boleo, ba natehēlwa ke go diha
go rata ga Modimo.

Moreri 7. 29; Genese 1. 31.

Poco 17. Modimo o no oa diha kgōla-
ganō ea go reñ le batho ba ntlha ?

Karabō. Kgōlaganō e Modimo o e
dihileñ le batho ba ntlha e ne e le go re
ha batho ba utlwa Modimo ba tla tshela,
me ha ba gana go o utlwa ba tla shwa
rure.

Genese 2. 15-17; Esekle 18. 20;
Baroma 6. 23.

Kaga boleo

Poco 18. Boleo ke eñ ?

Karabō. Boleo ke go gana go utlwa
Modimo ka lehoko, le ka mogopolو, le
ka tihō, ka go diha se o se iditseñ le ka
go bisa go diha se o se laotsen.

1 Yohane 3. 4; Isaia 53. 6.

Poco 19.—Rona batho re tsalecwe mo
popegoñ e e ntseñ yañ ?

Karabō. Batho rotlhe re tsalecwe mo
popegoñ e e boleo ka gonne re yele
boshwa yoa mekgwa ea borraecho-mogo-
lwane, le maikutlwō a bōna.

Baroma 5. 19; 2 Dikgosi 17. 41.

Poco 20. Maleo a batho ba a leohañ ke a a ntseñ yañ ?

Karabō. Maleo a batho mararo eboñ a pelo, le a loleme, le a ditihō.

Diane 6. 16-19 ; *Yeremia 17.* 9-10 ; *Yakobo 1.* 26.

Poco 21. Boleo yoa pelo ke eñ ?

Karabō. Boleo yoa pelo ke go tlhokomologa Modimo, le bopelompe, le bo-kgōpō, le kilō, le bopelo-tshetlha, le megopolō eotlhe e e boshula, le dikeleco tse e señ cōna.

Pes 14. 1 ; *Diane 6.* 16-19 ; *Mareko 7.* 21-22.

Poco 22. Maleo a magolo a loleme ke eñ ?

Karabō. Maleo a magolo a loleme ke go umaka leina ya Modimo ka bose-natshisimogo, le go ikana ka leina ya ñona ; ke go rogaka, le go kgala, le go kgōba, le go tlhapatsa, le go aka, le go bua matlhapa, le go pateletsa batho ka rona.

Diane 17. 4 ; *Pes 39.* 1 ; *Yakobo 3.* 5-10.

Poco 23. Ditiho diñwe tse diñwe tse e leñ tsa boleo ke eñ ?

Karabō. Go ana, le go òbamèla me-

dimo e e señ eōna, le go gana go utlwa bagolo, le go ōmana, le go lwa, le go tlhokomologa tse di molemō, le go utlusa batho botlhoko, le go bisa go leha melato re nonohile go diha yalo, dithihō tse le cōna ke boleo.

Yoshua 24. 20; *Yakobo* 4. 17; *I Yohane* 5. 17.

Poco 24. Motho o chwanecwe ke eñ kaga dibe tsa gagwè?

Karabō. Ere ka motho a gana go utlwa Modimo, Mmopi oa gagwè, le Tsala e kgolo ea gagwè, o chwanecwe ke peco, mo lobakeñ lono, le mo go lo lo tlañ.

Esekiele 18. 14; *Bagalatia* 3. 10; *Baroma* 6. 23.

Kaga Boichwarelō yoa dibe

Poco 25. A Modimo o tlo o ichwarele dibe ha motho a lōpa hèla?

Karabō. Ha Modimo o ka ichwarèla dibe ka go lopiwa hèla, batho ba ka tla ba raélwa go leoha ba re, ga se sepè, re tla ichwarèlwaa. Modimo o lōpa boikwa-tlhaō yo bo tletsen.

Yoele 2. 13; *Ditihō* 3. 19; *I Yohane* 1. 9.

Poco 26. A go utlwa botlhoko kaga
dibe, a go tla rèka boichwarèlō ?

Karabō. Ere ka legodu le sa kake ya
atlholèlwa ka a utlwa botlhoko, le Modimo
ga o kake oa re ichwarèla ka ntlha
ea bohutsana yoa rona hèla.

*Mat. 18. 3 ; Luka 13. 3 ; 2 Bakorintha
7. 9-10.*

Poco 27. A motho o ka ipoloka ka
tihó tsa gagwè tse di molemō ?

Karabō. Ere ka re chwanetse go
diha ditihō tse di molemō ka malatsi
aotlhe, boleo ga bo kake yoa arabèlwa
ke ditihō tse di molemō tse e leñ tsa rona.

Mika 6. 8 ; Bagalatia 2. 16 ; Tito 3. 5.

Poco 28. A batho ba ka boloka batho
ka bôna ?

Karabō. Nya, boleo bo chwanetse go
belediwa, le thatō ea Modimo e chwanetse
go inèlwa, baleohi ba e se ba bolokwe, me
ke gôna batho ga ba kake ba utlwèla
Modimo batho ka boña.

*Baroma 3. 10 ; Ditihō 4. 12 ; Bae-
fesia 2. 5.*

Kaga Morèna Yesu Keresete

Poco 29. Modimo o ipōnaditse yañ
ha o ratile batho segolo thata ?

Karabō. Modimo o bōnaditse loratō lo logolo loa ūna ka go nèla Morwa ūna eo o tsecweñ a le esi a nè Mmoloki oa batho.

Yohane 3. 16; *Baroma* 5. 19; *I Yohane* 4. 14.

Poco 30. Morwa eo o tsecweñ a le esi oa Modimo ke mañ?

Karabō. Morwa eo o tsecweñ a le esi oa Modimo ke Morèna Yesu Keresete, eo go eseñ go cwe Cosè a bo a ntse le Modimo, me ea bo e le Modimo, me a cwa Mmoloki oa batho.

Luka 1. 35; *Mat.* 14. 33; *Mareko* 1. 1; *Baroma* 1. 4.

Poco 31. Morèna Yesu Keresete o dule Mmoloki ka go reñ?

Karabō. Go re a cwè Mmoloki oa batho, Morèna Yesu Keresete a apola kgalalèlō ea gagwè, a ikisa kwa tlhatshe me a cwa motho ka go tsalwa ka Maria oa kgarebe, a aga mo lehatshiñ e le motho eo o senañ boleo, a shwèla mo mokgoroñ kaga dibe tsa batho, a hitlhwa, me a tloga a coga mo loshuñ, a tlhatlogèla kwa legodimoñ a ea go re bōnalèla ha pele ga Modimo.

Luke 2. 6-20; *Isaia* 53. 6; *Yohane* 1.

29; 1 *Peterē* 2. 24; 1 *Bakorinthā* 15. 3-4.

Poco 32. Morèna Yesu Keresete o na a cwa motho ka ntīlha eañ?

Karabō. Morèna Yesu Keresete a cwa motho gore a nè sekaō mo go rona sa motho eo o boitshèpō yo bo tletseñ, le gore a re rutè thutō ea gagwè ea selegodimo, a bè a re shwèle go re a re bōnèlè tshiamèlō ea go tshela botshelō yo bo sa khutleñ, e bile a cwa motho go re a re letlanyè le Modimo.

Yohane 13. 15; 1 *Peterē* 2. 21; *Yohane* 1. 12; 2 *Bakor.* 5. 19.

Poco 33. Morèna Yesu Keresete o bogileñ go re a tlè a bolokē batho?

Karabō. Morèna Yesu Keresete o bogile dipogishō di le dintsi, a nyadiwa, a ganwa ke batho, a inèla mo bogaleñ yoa Modimo, me a ichōkèla losho lo lo hutsegiten loa mokgōrō.

Ditihō 3. 13-15; *Yohane* 1. 11; *Baflepī* 2. 8.

Poco 34. Morèna Yesu Keresete o dihileñ gore a re bōnèlè botshelō yo bo sa khutleñ?

Karabō. Morèna Yesu Keresete o chwere molaō oa Modimo ka botlalō, me

a dihèla batho ba e leñ ba gagwe tshiamō e e tletseñ.

Bahebera 2. 10 ; 1 Petere 2. 22 ; Bahebera 7. 26-27.

Poco 35. Morena Yesu Keresete o na a ea kae a sena go shwa ?

Karabō. Erile a sena go shwa Morèna Yesu Keresete a nna mo phupuñ ka loba-kanyana, me ka tsatsi ya boraro a coga mo loshuñ, a ipōnatsa mo bathuñ, me a tloga a tlhatlogèla kwa legodimoñ, kwa o dutseñ gôna ha seatleñ se segolo sa Modimo, a ntse mo kgalaleloñ.

Mareko 15. 42-47 ; Mat. 28. 1-10 ; Yohane 20 ; Luke 24. 50, 53.

Poco 36. Morèna Yesu Keresete oa re dihèla polokō gompiyeno ka go reñ ?

Karabō. Morèna Yesu Keresete oa re dihèla polokō gompiyeno ka go re rapèlèla, le ka go re laola le go re disa, le ka go re ruta go itse le go diha go rata ga gagwè.

Bahebera 7. 25 ; Yohane 15. 14 ; Yohane 10. 14 ; Yohane 14. 26.

Poco 37. Ditihō tsa ga Yesu Keresete e le Mmoloki oa rona ke tse di ntseñ yañ ?

Karabō. Morèna Yesu Keresete ke Moperofeti, le Moperisiti, le Kgosi mo bathuñ ba gagwè.

Bahebera 1. 2 ; *Bahebera* 7. 26 ;
1 *Timotheo* 6. 13-15.

Poco 38. Morèna Yesu Keresete ke Moperofeti yañ ?

Karabō. Morèna Yesu Keresete ke Moperofeti ka e le lencwe ya Modimo ye re le utlwañ mo Bibeleñ e bile o romile Mōea o o boitshèpō oa gagwè go re o re tlhaloganyetsè Lehoko ya Modimo, le go re tlhotlhelaetsa go le dumèla.

Yohane 1. 18 ; *Mathaio* 11. 27 ; *Mat.* 17. 5 ; 1 *Bakorintha* 2. 10-11.

Poco 39. Morèna Yesu Keresete ke moperisiti yañ ?

Karabō. Morèna Yesu Keresete ke moperisiti ka a kile a na a inèla e le chupèlèlo ea boleo, le ka gonne o ntse a rapèlèla batho ba gagwè a le mo legodimoñ.

1 *Petere* 2. 24 ; *Bahebera* 9. 25 ; *Bahebera* 2. 17-18.

Poco 40. Morèna Yesu Keresete ke Kgosi yañ ?

Karabō. Morèna Yesu Keresete ke kgosi ka go kgōna batho ba gagwè gore ba mo utlwè, le ka go ba busa, le ka go thiba le go henya baba ba bōna.

Isaia 53. 22 ; *Ditihō* 5. 31 ; *Baroma* 8. 37.

Kaga Polokō

Poco 41. Go lopiwañ mo mothuñ gore a tlè a bolokwè ?

Karabō. Go lopiwa mo mothuñ a tlè a bolokwè gore a ikwatlhæe, a dumèlè mo Moreneñ Yesu Keresete.

Mareko 1. 15 ; Yohane 3. 16 le 36 ; Ditihō 16. 31.

Poco 42. Go ikwatlhæa ke eñ ?

Karabō. Go ikwatlhæa ke go shokologèla boleo go ea Modimoñ, motho a hutsahetse kaga dibe tsa gagwè me a ikaeletse go utlwa òna.

Isaia 59. 20 ; Hosea 12. 6 ; Ditihō 26. 20 ; Esekiele 18. 27.

Poco 43. Go dumèla mo go Morèna Yesu Keresete ke eñ ?

Karabō. Go dumèla mo go Morèna Yesu Keresete ke go dumèla ha a le Mmooliki oa baleohi le oa rona, ke go dumèla ha a nonohile, a bile a ratile go re boloka me le gôna ke go mo amogèla mo peduñ, re mo ikantsè, re dihile kgôlaganò naè ea go tshela kaha go rateñ ga gagwè.

Bahebera 11. 1 ; Yohane 4. 42 ; Bahebera 7. 25 ; Yohane 1. 12.

Poco 44. Tumèlō e e leñ eōna ea mmanete e ka itsiwe kañ ?

Karabō. Tumèlō e e leñ eōna ea mmanete e ka itsiwe ka e cosa loratō Modimon mo mothuñ, e ntlahatsa pelo ea gagwè, me e mo gögèla go tlhōahalèla ditihō tse di molemō, le go henya cotlhe tse di shokameñ le tse di shokamisañ.

1 *Bakorintha* 13. 2 ; 2 *Bathesalonika* 1. 11-12 ; *Yakobo* 2. 17 ; 1 *Yohane* 5. 4.

Poco 45. Batho ba tlhotlhelediwa go ikwatlhaea le go dumèla ke mañ ?

Karabō. Batho ba tlhotlhelediwa go ikwatlhaea le go dumèla ke mōea o o Boitshèpō, me ke gōna re chwanetseñ go itopèla thushô ea òna.

Baefesia 2. 8 ; 1 *Bathesalonika* 4. 8 ; *Baroma* 8. 26.

Kaga Mōea o o Boitshèpō

Poco 46. Mōea o o Boitshèpō ke mañ ?

Karabō. Mōea o o Boitshèpō ke mōea o Modimo o dihañ mo meoeeñ ea batho ka òna.

Yoele 2. 28 ; *Luke* 11. 13 ; 1 *Bathesalonika* 4. 8.

Poco 47. Mōea o o Boitshèpō o gōgèla batho mo go ikwatlhaeñ ka go reñ ?

Karabō. Mōea o o Boitshèpō o gōgèla batho mo go ikwatlhaeñ ka go bua nabō ka pelo, le ka Lehoko ya Modimo o ntse o ba hea ha e le baleohi, le go ba tlhō-mamisetsa loratō loa ga rrabō eo o kwa legodimoñ lo lo bōnatshegileñ mo go Morēna Yesu Keresete, le ka go ba naea pelo ea go ila boleo le mekgwa ea yōna, le thata ea go bo latlha.

Yohane 16. 13-15 ; 1 Bakorintha 12. 7 ; Yohane 14. 26.

Poco 48. Mōea o o Boitshèpō o gōgèla batho go dumèla ka go reñ ?

Karabō. Mōea o o Boitshèpō o gōgèla batho go dumèla ka go ba ruta ha Yesu Keresete a nonohile, a bile a rata go ba boloka, le ka go ba kgōna go inèla mo go èna ka boikanyō, le ka loratō, le ka mōea oa go mo utlwa.

Baelesia 3. 16 le 17 ; 1 Bakorintha 1. 9.

Poco 49. Batho ba balwa e le basiami ha pele ga Modimo ka eñ ?

Karabō. Batho ba balwa e le basiami ha pele ga Modimo e señ ka ntlha ea ditihō tsa bōnè tse di molemō, me e leñ

ka ntlha ea tshiamō ea Morèna Yesu Keresete e ba e bōnañ ka go utlwana naè.

Baroma 3. 21-24; *Tito* 3. 5-8; *Bae-fesia* 3. 4-5.

Poco 50. Batho ba cwa bana ba ga mañ ka go dumèla ?

Karabō. Ka go dumèla batho ba bōna tshiamèlō ea go cwa bana ba Modimo, me Morèna Yesu Keresete o ntse hèla yaka mogoloabōna, me bōnè e le baya-boshwa mmōgô naè.

Yohane 1. 12; 1 *Yohane* 3. 2; *Baroma* 8. 15-17.

Kaga Boitshepisho yoa Moea oo Boitshèpō

Poco 51. Boitshepisho ke eñ ?

Karabō. Boitshepisho ke phetolō e e dihwañ mo moeeñ ke Mōea oo Boitshèpō; ke boshahaco yoa motho mo sechwanoñ sa Modimo, mo tshiamoñ, le mo boitshepoñ yo bo amarure.

2 *Bathesalonika* 2. 13; *Bafesia* 4. 24; *Baroma* 8. 2.

Poco 52. Motho o chwanetse go reñ ha a rata go cwa Moitshepi ?

Karabō. Ha motho a rata go cwa

Moitshepi o chwanetse go chwara molaō oa Modimo, le go shwèla dithushō cotlhe tse di itshepisan molemō, ka tlhōahalō, ka thushō ea Mōea o o Boitshèpō.

Yohane 14. 23; *Bagalatia* 5. 16; *Baroma* 8. 26-27.

Poco 53. Thushō ea Mōea o o Boitshèpō e ka bônwa yañ?

Karabō. Thushō ea Mōea o o Boitshèpō e ka bônwa ka go e lōpa mo Modimoñ ka leina ya ga Yesu Keresete, eo o re tlhōmamiseditseñ ha Modimo o tla o naea ha motho a o rapeletse.

Mathaio 7. 7; *Yohane* 15. 16; *Bae-fesia* 1. 15-19.

Poco 54. Mōea o o Boitshèpō o rata oa re dihèlañ?

Karabō. Mōea o o Boitshèpō o rata oa tla go nna mo peduñ tsa rona, le go tlosa gotlhe mo go boleo mo go cōna, le go di tlatsa ka loratō Modimoñ le mo bathuñ, e le loratō lo lo nañ le boitumèlō le kagishō.

Bagalatia 4. 6; 1 *Bakorintha* 6. 11; *Bagalatia* 5. 22.

Poco 55. Mōea o o Boitshèpō o hutsa-hadiwa ka go reñ?

Karabō. Dipelo tsa batho di chwa-

netse go nna e le ditempela tsa Moea o o Boitshèpō, me o hutsahadiwa e tle e re batho ba leshwèhatse tempela ea òna ka go leoha.

I Bakorintha 3. 16 ; Baefesia 4. 30-31 ; Bahebera 3. 10.

Kaga Matshegō a ba ba dumèlañ

Poco 56. Batho ba ba ikwatlhaileñ ba dumèla mo go Morèna Yesu Keresete ba nèwa matshegō a a ntseñ yañ mono lehatshiñ ?

Karabō. Batho ba ba ikwatlhaileñ, ba dumèla mo Moreneñ Yesu Keresete ba ichwarèlwā dibe tsa bōnè, ba letlañwa le Modimo, ba amogèla mōea oa boñwana, me ba ka lebèlèla go bōna mo Modimoñ chwarō le tshegohaco.

Baroma 5. 1-2 ; 2 Bakorintha 5. 19 ; Bagalatia 4. 5 ; Tito 3. 7.

Poco 57. Badumedi ba sholohediwa ha ba tla tloga ba bōna matshegō a a ntseñ yañ ?

Karabō. Mogañ ba shwañ ba ba ikwatlhaileñ, ba dumetse mo go Morèna Yesu Keresete ba tla tloga ba ea go nna naè, me e tla re ka letsatsi ya bohèlō, mogañ Keresete o tlañ go atlholà leha-

tshe ba tla ipolèlwa ke èna ka choshologō, ba galalediwa mo moeeñ, me ba segohalediwa rure mo boitumeloñ yoa go nna ha pele ga sehatlhōgō sa Modimo ka bosenabokhutlō.

*Yohane 14. 2; Mathaio 10. 32;
Mathaio 25. 34; Tshenolō 7. 13-17.*

Kaga Phuthègō

Poco 58. Phuthègō ea Modimo ke eñ ?

Karabō. Phuthègō ea Modimo ke batho botlhe ba dichaba cotlhe, le ba metlha eotlhe ba ba kitlañwañ ke Mōea o o Boitshèpô mo Moreneñ Yesu Keresete, eo o leñ Tlhōgō e le eosì ea bōna, ka tumèlō mo go èna.

Mathaio 28. 18-20; 1 Bakorintha 3. 9; Baejesia 2. 20-21; le 1. 22.

Kaga Molaō oa Modimo

Poco 59. Molaō oa Modimo ke eñ, me o ka bōnwa kae ?

Karabō. Molaō oa Modimo ke tható ea ñona ea go re batho ba chwanetse go diha eñ le go lesa eñ, me o ka bōnwa mo Bibelein.

Mika 6. 8; Yohane 6. 39; Baejesia 5. 17.

Poco 60. Morèna Yesu Keresete o shobokantsè molaō otlhe mo go reñ?

Karabō. Morèna Yesu Keresete o shobokantsè molaō otlhe ka go re. U ratè Morèna Modimo oa gago ka pelo ea gago eotlhe, le ka mōea oa gago otlhe, le ka tlhaloganyō ea gago eotlhe, le ka thata ea gago eotlhe. U ratè oa ga eno yaka u ithata.

Mareko 12. 30-31.

Poco 61. Go rata Modimo ka pelo eotlhe ke go reñ?

Karabō. Go rata Modimo ka pelo eotlhe ke go o gopolèla ka megopolō e e molemō thata, ke go rata botsalanō yoa òna bogolo go gotlhe, le go itumèla go o kgatlha ka metlha le methla, le go inèla go diha yalo.

Yoshua 22. 5; i *Bakorintha 8. 3;*
Yohane 14. 23.

Poco 62. Go rata oa ga eno yaka u ithata ke go reñ?

Karabō. Go rata oa ga echo yaka ke ithata ke go dihèla batho yaka nka rata ba ntihèla ha ke ne ke le mo boemoñ yoa bôna.

Mathaio 7. 12; i *Yohane 4. 20-21;*
Bahebera 13. 1.

Poco 63. Erile pele molaō oa Modimo o bolèlwa mo Bibelein ka eñ ?

Karabō. Molaō oa Modimo o bolèlwa ka bokhuchwane mo Ditaoloñ tse di shomè.

Deuteronomie 4. 13, le 11. 1.

Poco 64. Ditaolō tse di shomè ke eñ ?

Karabō. Ditaolō tse di shomè ke ditaoló tse Modimo o di netsen bana ba òna yale ka o reile, Baiseraela o re, Ke nna Yehofa, modimo oa gago eo o gu ntshitseñ mo hatshiñ ya Egepeto, mo tluñ ea bothhanka.

Ekesodo 20. 1-17.

Kaga Taolō ea ntlha

Poco 65. Taolō ea ntlha ea reñ ?

Karabō. Taolō ea ntlha ea re. “ U se ka ua na le medimo e sele ha pele ga me.”

Ekesodo 20. 3.

Poco 66. Taolō ea ntlha e ruta batho eñ ?

Karabō. Taolō ea ntlha e ruta batho go re ba chwanetse go rata Modimo, le go o boiha, le go o sisimoga, le go o galaletsa, le go o òbamèla, e bile ba chwa-

netse go o ikanya o le osi le go bisa go
ōbamèla opè o sele.

Bahébera 12. 28; *Mathaio* 5. 16;
1 *Bakorintha* 6. 20; 1 *Timotheo* 4. 10.

Poco 67. Ke ka ntlhaeañ batho ba
chwanetse go ūbamèla Modimo osi?

Karabō. Batho ba chwanetse go
ōbamèla Modimo o le osi, ka e le ūna o o
gaisañ ka molemō, ko ūna o re neileñ
botshelō, le dilō cotlhe, e bile ko ūna o
ratañ go re yesa monate ka metlha le
metlha.

Isaia 37. 20; *Ditihō* 17. 25; *Ditihō* 14. 17.

Poco 68. A motho o chwanetse go
bina serètō sa ga gabō?

Karabō. Nya, motho ga a chwanèla
go bina serètō sa ga gabō, ka ga se Mmopi
oa gagwè le motshegetsi, me go bina mouō
ke moila mo Modimoñ.

1 *Bakorintha* 8. 5-6; *Bagalatia* 4.
8-9; *Luke* 16. 15.

Poco 69. Modimo o lōpa kōbamèlō e e
ntseñ yañ?

Karabō. Modimo ke mōea, me o lōpa
go re o ūbamèlwè ka mōea le ka boama-
rure. Go cosa modumō, le go bua-
buèla ke moila hèla mo go ūna (*Ha motho*

a tla go obamèla o chwanetse go sisimoga a le mo tluñ ea thapèlèlō, e bile a tla a itshekile mo mmedin, le mo diaparoñ tsa gagwè. Go tla motho a sa itsheka ke go nyatsa Modimo).

Yohane 4. 24 ; Mat. 6. 7 ; Yakobo 4. 8 ; Ekesodo 19. 10-II.

Poco 70. A batho ba chwanetse go ikanya moupō, le merèō, le dipheko, le dilō tse di ntseñ yalo ?

Karabō. Ere ka dilō tse di sena thata ea go thusa, leha e le go boloka batho, leha e le go thiba boshula mo go bōna, batho ga baa chwanèla go di ikanya. Go di ikanya ke boeleele, le bonyana hèla, mo ke go di ntsha medimonyana.

Isaia 30. 5 ; 2 Timotheo 3. 9.

Poco 71. Batho ba chwanetse go bakèlañ Modimo ?

Karabō. Batho ba chwanetse go baka Modimo ka go bo o ba neile botshelō le matshegō aotlhe a selehatshe, a ba a yañ monate ; me bogolo go gotlhe ka ntlha ea loratō lo logolo loa ñona loa go roma Morwa ñona eo o esi gore a tlè go nna Mmoloki oa bōna.

Pesalema 103. 1-6 ; Baroma 5. 8 ; 1 Yohane 4. 10.

Poco 72. Ha motho a lwala o chwanetse go reñ ?

Karabō. Ha motho a lwala o chwanetse go ikokobetsa ha pele ga Modimo, le go batla boichwarèlō yoa dibe tsa gagwè, o chwanetse go shwèla ditlhare tse di hodisañ molemō, le go batla tshegohaco ea Modimo mo ditlhariñ tseuō, le go inèla ka pelo-telele mo thatoñ ea Ona.

Yakobo 4. 9-10 ; 2 Dikgosi 20. 7 ; Yakobo 5. 14 ; Mat. 26. 39.

Poco 73. A boñaka yoa Secwana bona le thata ea go hodisa malwetse ?

Karabō. Ha boñaka yoa Secwana e le go alaha ka ditlhare tse di nowañ, motlha moñwe bo na le thata, me ha e le go rwesa moraba, le go ntsha motho ñwakō, le go rea, ga bo na tihō, ke bonyana hèla le bosilo.

Deuteronomie 18. 10-13.

Kaga Taolō ea bobedi

Poco 74. Taolō ea bobedi ea reñ ?

Karabō. Taolō ea bobedi ea re, U se

ka ua itihèla sechwanchō se se setilweñ, leha e le sechwanoñ sepè sa se se kwa legodimoñ, leha e le sa se se mo lehatshiñ kwa tlhatshe, leha e le sa se se mo lewattleñ. U se ka ua di ikōbèla, leha e le go di dihèla.

Ekesodo 20. 4-5.

Poco 75. Taolō ea bobedi e re rutañ ?

Karabō. Taolō ea bobedi ea re ruta go re re se ka ra òbamèla medimo ea disètō, le e señ go òbamèla Modimo ka mokgwa o o sa chwanèlañ, me e le go isa Modimo kōbamèlō e e leñ ea dipelo tsa rona.

Deuteronomie 4. 15 ; Yohane 4. 23.

Poco 76. Go bina medimo ea disètō go lehèla ka ntlhaeañ ?

Karabō. Go lehèla go bina medimo ea disètō ka ntlha ea go bo ga e na thata go iphemèla, leha e le go dihèla ba ba e òbamèlañ ; me go boleo ka gonne go e bina ke go tlola molaō oa Modimo.

Bakolosa 2. 18 ; 2 Bakorintha 6. 16.

Kaga Taolō ea boraro

Poco 77. Taolō ea boraro ea reñ ?

Karabō. Taolō ea boraro ea re, U se

ka ua ipiletsa lehèla Leina ya ga Yehofa, Modimo oa gago ; gonne Yehofa ga a ketla a no atlholèla eo o biletisan Leina ya gagwè lehèla.

Ekesodo 20. 7.

Poco 78. Taolō ea boraro e re rutañ ?

Karabō. Taolō ea boraro ea re ruta go re, go ikana mo go señ gōna, le go rogaka, ke maleo a magolo, le go re leina ya Modimo, le ya dilō tse di boitshèpō, le chwanetse go buiwa ka tshisimogō.

Mathaio 5. 34-35 ; Pesalema 29. 2 ; Tshenolō 15. 4.

Kaga Taolō ea bonè

Poco 79. Taolō ea bonè ea reñ ?

Karabō. Taolō ea bonè ea re, Gakologélwa Letsatsi ya Sabata go le itshepisa. U dihè, u bo u shwetsè tihō eotlhe ea gago ka malatsi a le marataro, me tsatsi ya boshupa ke Sabata go Yehofa, modimo oa gago.

Ekesodo 20. 8-10.

Poco 80. Taolō ea bonè e re rutañ ?

Karabō. Taolō ea bonè ea re ruta go re Modimo o re neile malatsi a le marataro a weke a go diha tihō e e leñ eōna

ea rona, me tsatsi le le leñwe hèla le chwanetse go chwaèlwa boikhuco le kòbamèlō, le itshepisicwe : Bakeresete ba chwaea tsatsi ya ntlha ya weke ka e le yeôna ye Morèna Yesu o cogileñ mo loshuñ ka yeôna.

Deuter. 5. 12 ; Luke 23. 56 ; Ditihō 20. 7 ; Mareko 16. 1-8.

Poco 81. Ditihō tse go lettelecweñ go di diha ka tsatsi ya Sontaga ke dihe ?

Karabō. Ga goa lettelelèlwa go bereka, leha e le go bapala le go bapatsa leha e le go tshameka ; me go lettelecwe go diha tihō tse di sa kakeñ tsa lesiwa, le tsa boutlwèlō-botlhoko, go hudisa le go nosa dikgomo, go òka le go thusa balwetsi, le go ruta.

Lefitiko 23, 3 ; Mareko 2. 27-28 ; Mathaio 12. 11-12.

Poco 82. Chwanèlō ea rona ea go phuthèga ka Sontaga ke eñ ?

Karabō. Re chwanetse go phuthèga ka tshipi le tshipi, re ipaea ka masisi, re inèla mo go obameleñ Modimo ka mōea, me re chwanetse go tlhōla re ganèla, ka thushō ea Òna go diha mo re go rutilweñ.

Ditihō 13. 44 ; Tshenolō 1. 10 ; Bahebera 10. 25.

Kaga Taolō ea botlhano

Poco 83. *Taolō ea botlhano ea reñ ? Karabō.* *Taolō ea botlhano e re, Tlotla rrago le mmago, go re malatsi a gago a nè mantsi mo hatshiñ ye Yehofa, Modimo oa gago, o le gu neileñ.*

Ekesodo 20. 12.

Poco 84. *Taolō ea botlhano e re rutañ ? Karabō.* *Taolō ea botlhano ea re ruta go re re chwanetse go rata batsadi ba rona, le bagolo ba re mo taoloñ ea bōna, le go ba tlōla, le go ba utlwa, le go ba thusa : me e bile e ruta go re Modimo o tla segohatsa ba ba dihañ yalo ka tshegohaco e e leñ eōna.*

Baejesia 6. 1-3 ; *Baroma* 13. 1 ; *Bahébera* 13. 7.

Poco 85. *A re chwanetse go diha boshula ha re laocwè ke bagolo go bo diha ?*

Karabō. *Leha batsadi ba rona kgo-tsa bagolo ba re laola go diha mo go ka tlolañ molaō oa Modimo ga rea chwanèla go go diha, Ka gonne Modimo o chwanecwe ke go utlwiwa bogolo go batho.*

Amose 5. 14 ; 3 *Yohane* 11 ; 1 *Petere* 4. 15.

Poco 86. Chwanèlō ea bagolo mo batlhanskeñ ba bôna ke eñ ?

Karabō. Beñ ba batlhanka ba chwanetse go duèla batlhanka tuèlō e e leñ ea bôna ka lobaka lo e chwanetseñ ka lôna ; ba chwanetse go ba dihèla ka bopelonomi, ba batla go ba yesa monate mo hatshiñ yeno, le mo go ye le tlañ.

Luke 10. 7 ; Yakobo 5. 4 ; Baejesia 6. 9.

Poco 87. Chwanèlō ea batlhanka mo bagoloñ ke eñ ?

Karabō. Batlhanka ba chwanetse go utlwa le go tlotla bagolo, go tlhōahala mo tihon̄ leha bagolo ba seeō ; ba chwanetse go na boikañō mo diloñ cotlhe tse e leñ ba bagolo ba bôna.

I Petere 2. 17-18 ; Baejesia 6. 5-6 ; Tito 2. 14, le 3. 14.

Poco 88. Chwanèlō ea balaodi ke eñ ?

Karabō. Balaodi ba chwanetse go diha ka tshiamō mo go ba ba mo taoloñ ea bôna, ba ithiba mo go patikeñ bahu-manegi, ba gana thata thata go duèlwa tshèkō.

Isaia 33. 15 ; Diane 14. 31 ; Diane 20. 26 le 28.

Poco 89. Chwanèlō ea ba ba mo taoloñ ke eñ ?

Karabō. Ba ba mo taoloñ ba chwaretse go tlotla ba ba ba laolañ, le go inèla mo ditaoloñ cotlhe tse e leñ cōna, le go kgètha ka tshiamō, le go agisanya sentlè.

Baroma 13. 1 le 7 le 8 ; *Baroma 12.* 10.

Kaga Taolō ea borataro

Poco 90. Taolō ea borataro ea reñ ?

Karabō. Taolō ea borataro ea re, U se ka ua bolaea *motho*.

Ekesodo 20. 13.

Poco 91. Taolō ea borataro e re rutañ ?

Karabō. Taolō ea borataro ea re ruta go re botshelō yoa motho ke nèō e e masisi ea Modimo, le gore re chwanetse go kgaogana le kilō eotlhe le tlhōō, le gore re ithibè mo bogaleñ, le mo pusholoshuñ, le maikutlwoñ aotlhe a a ka gōgèlañ go bolaea, le go re re chwanetse go iphemèla le go hemèla ba bañwe.

Mathaio 19. 18 ; *Baroma 12.* 19 ;
Baejesia 4. 31.

Poco 92. A ditshedi tse di yewañ di ka tlhaywa ?

Karabō. Ditshedi yaka dikgomo le diphōlōhōlō re ka di tlhaba e le diyō, me go boleo go di tlhokohatsa, le go di coma ka tshamekō.

Deuter. 12. 15 ; I Bakorintha 10. 25 ; Genese 49. 6-7.

Poco 93. Go inèla bogaleñ go uñwa mashula ahe ?

Karabō. Go inèla bogaleñ go uñwa pelompe, le kgalō, le tlhapaco, le thogakō, le go lwa ; me motlha moñwe go uñwa go bolaea motho.

Mathaio 5. 21-22 ; Bakolosa 3. 8.

Poco 94. Mauñō a a boshula a go nwa boyalwa bobe le khadi, le go ya matukwane ke ahe ?

Karabō. Botagō yoa mayalwa aotlhe, le matukwane bo latlha madi, bo senya tshiamō, bo cosa bohutsana, le dipobolō, le losho, mo hatshiñ yeno, le tshenyègō e e sa heleñ mo go ye le tlañ.

Diane 20. 1, le 23. 31-32 ; Yoele 1. 5 ; I Bakorintha 6. 10.

Kaga Taolō ea boshupa

Poco 95. Taolō ea boshupa ea reñ ?
Karabō. Taolō ea boshupa ea re, U
 se ka ua akahala.

Ekesodo 20. 14.

Poco 96. Taolō ea boshupa e re rutañ ?
Karabō. Taolō ea boshupa ea re
 ruta gore nyalō e chwanetse go kaiwa
 ha e le popègō e e tlotlègañ, e e sa chwa-
 nélwañ ke go tlotlololwa ; le go re batho
 rotlhe re chwanetse go na bantlè mo
 mogopoloñ, le mo puoñ, le mo mokgweñ,
 re tshabile leshwè yeotlhe ya mogopolo,
 le ya lehoko, le ya tihō.

Bahebera 13. 4; *Mat.* 5. 27-30; *Bae-
 fesia* 4. 29; *Bakolosa* 1. 6.

Poco 97. Mekgwa ea sekanyalō e e
 bolaeañ batho ka go ba leshwèhatsa ke
 a a ntseñ yañ ?

Karabō. Mekgwa ea sekanyalō e e
 bolaeañ batho ke lehuha, le bonyatsi, le
 bogadiñwana, le go tsaana ka lobakanyana hèla.

Diane 6. 32-35; 1 *Bathesalonika* 4.
 3-7; 1 *Bakorintha* 6. 9; *Bafesia* 5. 3.

Poco 98. Mekgwa euō e bolaea batho yañ?

Karabō. Ere ka nyalō e chwanetse go na bokōpanō yoa meōea ea batho ba le babedi, eseñ ea mebele e le eosí, mekgwa eotlhe e e kgaoganyañ meōea e senyetsa batho bontlè yoa bôna, ke gôna e ba bolaeañ.

Mathaio 5. 32, le 19, 3-6 ; Baefesia 5. 31.

Kaga Taolō ea bohèra-mebedi

Poco 99. Taolō ea bohèra-mebedi ea ren?

Karabō. Taolō ea bohèra-mebedi ea re, U se ka ua ucwa.

Ekesodo 20. 15.

Poco 100. Taolō ea bohèra-mebedi e re rutañ?

Karabō. Taolō ea bohèra-mebedi ea re ruta go re ga rea chwanèla go tsèla opè sepè ka tshiamololō, me re chwanetse go tshela ka tshiamō, ka tekanō, le ka pelo-ntlè mo diloñ cotlhe.

Bafilepi 2. 4 ; Baefesia 4. 28 ; Tito. 2. 12.

Poco 101. Boshula yo bo uñwañ ke poduhalō le bochwakga ke eñ?

Karabō. Poduhalō le bochwakga di ya lobaka, di re tsenya mo thaeloñ ea boleo, me gape di idicwe ke Modimo.

Diane 18. 9; *i Timotheo* 5. 13.

Poco 102. A re chwanetse go ithiba mo go tseeñ dilō molato?

Karabō. Re chwanetse go ithiba mo go eletseñ dilō tse re sa nonoheñ go di rèka, le go bereka thata go re re nonohè go di rèka bogolo go go tsaea sepè molato. Go bisa go leha melato e re e tseren ke bogodu.

2 Dikgosi 4. 7; *Baroma* 13. 8.

Poco 103. Boshula yoa go bèèlana ke bohe?

Karabō. Babèèlani ba na le dipelo tsa magodu, ba rata go tsèèla bañwe ka bôna dilō eseñ ka sepè, me mokgwa o o boshula o oa go bèèlana o tlo o gogele mo komanoñ, le mo bogoduñ tōta, e, le motlha moñwe mo polaoñ.

Diane 21. 6; *Yakobo* 1. 14, *le* 4. 1-2.

Kaga Taolō ea bohèra-moñwe hèla

Poco 104. Taolō ea bohèra-moñwe hèla ea reñ?

Karabō. Taolō ea bohèra-moñwe hèla

ea re, U se ka ua pateletsa moñwe ka wèna.

Ekesodo 20. 16.

Poco 105. Taolō ea bohèra-moñwe hèla e re rutañ?

Karabō. Taolō ea bohèra-moñwe hèla ea re ruta go re re chwanetse go tshaba tsieco eotlhe, go bua boamarure ka galè, le go bisa go bua boshula kaga batho ba bañwe.

Diane 24. 28; *Sekaria* 8. 16; *Bae-fesia* 4. 15.

Poco 106. Boshula yoa go aka ke eñ?

Karabō. Baaki ga ba ke ba dumèlwà leha ba ka bua boamarure, ba mo poihoñ ka malatsi aotlhe e se re kgotsa ba ka tla ba senoga; ba ilwa ke batho ba bañwe, me loleme lo lo buañ maaka ke moila mo matlhoñ a Modimo.

Diane 14. 5 le 25; *Bakolosa* 3. 9; *Tshenolō* 21. 8.

Poco 107. A go boshula go nna motho oa diteme-pedi?

Karabō. Go tsieco, go mashwè thata go bua kaga batho ka borèthè, ba le gôna, le go bua boshula kaga bôna ba

seeō, go dumèla motho a le ha, le go dumolola a seeō.

Yakobo 1. 8 ; Pesalema 5. 9 ; Baroma 3. 13.

Kaga Taolō ea leshomè

Poco 108. Taolō ea leshomè ea reñ ?

Karabō. Taolō ea leshomè ea re, U se ka ua iphètlha ka ntlo ea moñwe ka wèna. U se ka ua eletsa mosadi oa moñwe ka weña, leha e le motlhanka oa gagwè, leha e le lelata ya gagwè, leha e le kgomo ea gagwè, leha e le esela ea gagwè, leha e le sepè se e leñ sa moñwe ka wèna.

Ekesodo 20. 17.

Poco 109. Taolō ea leshomè e re rutañ ?

Karabō. Taolō ea leshomè ea re ruta go re re se ka ra tlhōma dipelo tsa rona mo go sepè se e leñ sa motho ka rona, me re chwanetse go itumèla hèla mo diloñ tse re di neilweñ ke Modimo, le eseñ go nna pelotshètlha kaga dilō tse e señ tsa rona.

Bahebera 13. 5 ; 1 Bakorintha 13. 4 ; Baflepi 4. 11.

Poco 110. Mauñô a boiphètlho ke ahe ?

Karabō. Ka ntlha ea boiphètlhō batho ba sera meōea ea bōna, ba tle ba wele mo molatuñ oa go aka, oa go patika, le oa go tlhokohatsa, go re ba tlè ba bapalè go le gonne.

Pesalema 106. 14-15 ; 1 Bakorintha 10. 10 ; Bagalatia 5. 26.

Poco 111. A go lettelecwe go hutsa ba ba re dihèlañ boshula ?

Karabō. Go hutsa ga go shulahatse batho ba ba hutsiwañ, me go wele mo tlhogoñ ea mohutsi : Go hutsa ga go utlwane le moea oa ga Keresete, me ke gôna batho ba chwanetseñ go segohatsa, eseñ go hutsa.

Mathaio 5. 44 ; Baroma 12. 14.

Poco 112. Re chwanetse go ba dihèla yañ ba ba re utlusañ botlhoko ?

Karabō. Re chwanetse go ba dihèla molemō, re leka go ba ntsha ditsala tsa rona ka go ichupa ha re le mo ntlheñ ea bōna.

Luke 6. 28 ; Baroma 12. 20.

Poco 113. Re chwanetse go tshaba batho ba ba ntseñ yañ ?

Karabō. Re chwanetse go tshaba botlhe ba ba ganañ go utlwa Modimo, l

baikepi botlhe. Ha re sa gane go tlwaelane nabō re ka tla ra ba etsa.

1 *Bakorintha* 1. 20 ; *Baesfesia* 5. 11-12 ;
2 *Bakorintha* 6. 14.

Kaga Mekgwa ea Secwana

Poco 114. A re chwanetse go chwara mekgwa ea ba ga echo, le ditemalō ?

Karabō. Pele re ese re inele go chwara mokgwa kgotsa temalō ea ba ga echo leha e le ea ga mañ, re chwanetse go akanya bo e molemō, kgotsa e boshula ; ha e le molemō re chwanetse go e tshegetsa, me ha e le boshula re chwanetse go e lesa, leha ba bañwe ba ka e chwara thata.

1 *Yohane* 4. 1 ; *Mathaio* 15. 3 ; *Bakolosa* 2. 8.

Poco 115. Molato oa Bogwèra le Boyale o eme mo go eñ ?

Karabō. Molato oa Bogwèra le Boyale o eme mo thutoñ ea thupishō eboñ ea go re ke tlhapishō leha e le bontlahaco ; le mo go reñ, Go itse maōma ke go na le botshelō ; ecwa ga go na tlhapishō epè ha e se ea ga Keresete, leha e le botshelō ha e se yōna yoa go utlwana le Modimo o o Boitshèpō.

Bakolosa 2. 9-15 ; *Baroma* 13. 12 ;
Yohane 17. 3.

Poco 116. Chwanèlō ea rona mo bahumanegiñ ke ea go reñ?

Karabō. Bacohe, balwetsi le ba ba houhetseñ ba chwanetse go dihèlwa ka molemō, me ba ba bobodu ba kgarkatshèga e le bakopi hèla, ka ba gana go bereka ba chwanetse go bo ba sa hiwe dikaco.

Bagalatia 2. 10; 1 Bathesalonika 4. 11; 2 Bathes. 3. 10-13.

Kaga Dithushō tsa Tshegohaco

Poco 117. Modimo o laotse go re batho ba thusiwè go bolokèga ka eñ?

Karabō. Dithushō tse Modimo o di laotseñ go re di thusè batho go bolokèga ke Lehoko ya Modimo, le Thapèlō, le Disakeremente.

Ditihō 2. 41; 2 Timotheo 3. 16; Luke 18. 1.

Poco 118. Lehoko ya Modimo le chwanetse go shwèlwa molemō yañ?

Karabō. Re chwanetse go shwèla Lehoko ya Modimo molemō ka tthisimogō e na le thapèlō ea go re Modimo o re

nèè Mōea o o Boitshèpō oa òna go le re tlhaloganyetsa.

Luke 8. 18 ; Yakobo 1. 5 ; Yohane 16. 13.

Poco 119. Lehoko ya Modimo le chwanetse go balwa ka mokgwa o o ntseñ yañ ?

Karabō. Re chwanetse go bala Lehoko ya Modimo ka tumèlō, le ka pelo e e rutesègañ. Re chwanetse go le bolokèla mo peduñ, le go sepela kaha go yeôna ka thushō ea Modimo.

2 Bakorintha 4. 2 ; Baroma 6. 17-18 ; 1 Yohane 2. 5-6.

Kaga Thapèlō

Poco 120. Thapèlō ke eñ ?

Karabō. Thapèlō ke boikopanyō yoa motho le Modimo mo moeeñ ka go choleletsa pelo mo go òna e le Rraecho, ka Morèna Yesu Keresete : ke go baea ditòpō tsa rona ha pele ga òna di na le boipolèlō yoa dibe le malebogō kaga mautlwèlō-botlhoko a a bonyweñ.

Bahebera 10. 19-25 ; Yakobo 4. 8 ; Baroma 14. 11-12 ; Bafilepi 4. 6.

Poco 121. A Modimo o utlwa tha-pèlō ka metlha eotlhe ?

Karabō. Modimo o utlwa thapèlō ea rona ka galè, me o araba ka go re naea se o lemogileñ ka botlhale yoa òna le loratō, ha e le shōna se se ka re thusañ bogolo.

Isaia 59. 1; *Mat.* 6. 6; *Luke* 18. 1; 1 *Bathesalonika* 5. 17.

Poco 122. Re chwanetse go rapèla ka mokgwa o o ntseñ yañ?

Karabō. Re chwanetse go rapèla ka tshisimogō, me e le ka boikanyō yaka ñwana a tle a bue le rragwè. Re chwanetse go gakologèlwa ha e le Modimo o o Boitshèpō o re buañ naō, me re chwanetse go dibèla dipelo gore di se ka tsa theoga, me gapè re chwanetse go lōpa dithushō ka boamarure.

Luke 11. 1-2; *Bafesia* 6. 18; *Mathaio* 6. 5-6.

Poco 123. Re chwanetse go lōpa thushō ea ga mañ?

Karabō. Re chwanetse go lōpa thushō ea Mōea o o Boitshèpō go re o re nonotshè go rapèla sentlè ka go tlhotlhetsha dipelo tsa rona, go re ruta kaha re tla buañ le Modimo ka gōna, le ditōpō tse di re chwanetseñ.

Yohane 14. 26; *Yude* 20; *Baflepi* 4. 6-7.

Poco 124. Motho o chwanetse go rapèla leñ?

Karabō. E tle e re re le mo tlaleloñ le pitlaganoñ le mo thaeloñ, le mo boitumeloñ, le mo thusegoñ, re chwanetse go rapèla, me re chwanetse go choleletsa pelo mo Modimoñ gantsi, bogolo go le ka meshō eotlhe, le ka maitsiboeñ aotlhe.

Yakobo 5. 13 ; 1 Bathesalonika 5. 17 ; 1 Timotheo 2. 8.

Poco 125. Re chwanetse go dihañ kwa ntlè ga go rapèla go re re se ka ra heñwa ke thaèlō?

Karabō. Re chwanetse go dibèla dipelo tsa rona, re tshaba bolekane yoa batho ba ba boshula, le señwe le señwe se se ka leshwèhatsañ môea, me re ipatlèla bokōpanō le batho ba ba siameñ.

Diane 4. 23 ; 2 Bakorintha 6. 17 ; 2 Timotheo 2. 22 le 1 Timo. 6. 11.

Poco 126. A go chwanetse motho go itsheka-seka?

Karabō. Go itshekaseka go chwanetse motho, me o chwanetse go itemoga ka letsatsi le letsatsi, o leba go bôna molemō o o o dihileñ, le ña o o o lesitseñ, me o chwanetse go ipolèlèla Modimo

dibe, le go batla thushō ea Mōea o o
Boitshèpō go re a se ka a leoha gapè.

*Mathaio 7. 5; 2 Bakorintha 13. 5;
1 Yohane 1. 9; Bahebera 4. 14-16.*

Poco 127. Re ka kaèlwa thapeloñ ke
eñ?

Karabō. Lehoko yeotlhe ya Modimo
le ka re kaèla thapeloñ, me bogolo
thapèlō e Morèna Yesu Keresete o kileñ
a e ruta barutwa ba gagwè, eboñ e e
tleñ e bidiwe Thapèlō ea Morèna.

Baroma 8. 26-27; Mathaio 6. 5-8.

Poco 128. Thapèlō ea Morèna ea reñ?

Karabō. Thapelō ea Morèna ke e.
Rraecho eo o kwa legodimoñ: Leina
ya gago a le itshepisiwè: Bogosi yoa
gago a bo tlè: Go rata ga gago a go
dihwè mo lehatshiñ yaka kwa legodimoñ:
Re nèè gompiyeno diyō tsa rona tsa
letsatsi: Me u re ichwarèlè melato ea
rona yaka re ba ichwaretse ba ba ne ba
le molato go rona: Me u se re gògèlè mo
thaeloñ: Me u re gololè mo go eo o
boshula: Gonne pushō ke ea gago, le
thata, le kgalalèlō ka bosenabokhutlô.
Amen.

Poco 129. E bidicwe Thapèlō ea
Morèna ka ntlhaeañ?

Karabō. E bidicwe Thapèlō ea Morèna ka e le èna eo o rutileñ badumedi go e rapèla, eseñ ka gonne èna o e rapetse.

Mathaio 6. 9-13; *Luke* II. 1-4.

Poco 130. Ditòpō tsa Thapèlō ea Morèna di amañ?

Karabō. Ditòpō tse tharo tsa ntlha tsa Thapèlō ea Morèna di ama Leina ya Modimo, le Bogosi le Thatō, me ditòpō tse diñwe di ama tse batho ba di tlhōkañ.

Luke II. 2-4; *Mathaio* 6. 9-13.

Poco 131. Thapèlō ea Morèna e re ruta go re re chwanetse go rapèla ka mōea o o ntseñ yañ?

Karabō. Thapèlō ea Morèna ea re ruta go re re chwanetse go rapèla Modimo, re itemogile ha re le bana ba òna, re rapèla le ba bañwe, rea ba rapèlèla. E bile e re ruta go re re chwanetse go ichwarèlana ha re rata go ichwarèlwa ke Modimo.

Mathaio 6. 8; *Baefesia* 6. 18-20; I *Yohane* 5. 16; *Mathaio* 6. 14-15.

Kaga Dikgōlaganō kgotsa Disakaremente

Poco 132. A badumedi ba na le maōma?

Karabō. Badumedi ga ba na maōma

a ba a lōbañ, me ba na le ditihèlō tse di bidiwañ Disakaremente tse ba sa di tlhakaneleñ le ba e señ badumedi.

Poco 133. Sakaremente ke eñ ?

Karabō. Sakaremente ke kgōlaganō e e masisi ea Morèna Yesu Keresete le batho ba ba e dihañ naè, e shupa, e tlhōmamisa boemō yoa bōna, e bile ke tshegohaco e e thatahatsañ, e totisañ tumèlō ea bōna.

Bahebera 8. 6; 2 Bakorintha 3. 6; 2 Bathesalonika 2. 16-17.

Poco 134. Disakaremente tse di thailweñ ke Morèna Yesu Keresete ke dihe ?

Karabō. Disakaremente tse di thailweñ ke Morèna Yesu Keresete ke sa *Kolobeco* le sa *Selalelō*.

Mathaio 28. 18-20; Luke 22. 9.

Kaga Kolobeco

Poco 135. Kolobeco ke eñ.

Karabō. Kolobeco e shupa go utlwana ga eo o kolobedwañ le Morèna Yesu Keresete, ka go tshelwa metse; ke tlhapishō e e shupañ go ntlahadiwa mo boleuñ, le go amogèlélwa mo botsheloñ yo

bosha. Ke sekaō sa go re eo o kolo-bediwañ o amogetse poloka ea ga Yesu Keresete, a inèla go mo tshelèla. E bile ke sekaō sa go re mokolobediwa o ipole-tse Keresete, o latlhile tsalanō ea Lehatshe, me o ineletse rure mo go tsheleñ botshelō yo bo sa khutleñ.

Ditihō 22. 16; *Baroma* 6. 3-4; *Baga-latia* 3. 27; 2 *Bakorintha* 5. 17.

Poco 136. Erile Morèna Yesu Keresete a thaea Sakaremente sa Kolobeco o na a reñ?

Karabō. Erile Morèna Yesu Keresete a thaea Kolobeco a re “Thata eotlhe ke e neilwe mo legodimoñ, le mo lehatshiñ. Me ke gôna, tsamaeañ, lo dihè merahe eotlhe barutwa ba me, lo ba kolobetsè mo ineñ ya Rara, le ya Morwa, le ya Mōea o o Boitshèpō.”

Mathaio 28. 18-20.

Poco 137. Kolobeco e chwanetse go dihèlwa bomañ?

Karabō. Botlhe ba e leñ ba Phuthègō le banyana ba bôna ba chwanetse go dihèlwa kolobeco, ke go re ba ba ipole-tseñ ka boipolèlō yoa mmanete ba re, ba dumetse mo go Yesu Keresete.

Ditihō 2. 38-39; *Ditihō* 16. 15 le 33.

Poco 138. Go lopiwañ mo go ba ba godileñ ba ba batlañ go kolobediwa ?

Karabō. Go lopiwa mo bagoloñ ba ba kolobediwañ gore ba ipolèlè tumèlō e e dumèlèsègañ mo go Keresete ba re ke Mmoloki oa bôna, le go re ba ipolèlè ha pele ga batho, ba re, ba dihile kgôlaganô naè go mo tshelèla.

Ditihō 19. 18 ; *Bahebera* 10. 39 ; *Baelesia* 1. 13-14.

Poco 139. Go lopiwañ mo go ba ba lereñ banyana gore ba kolobediwe ?

Karabō. Go lopiwa, mo go lereñ banyana go re ba kolobediwè, tumalanô ea go re ba tla godisa banyana e le bana ba Modimo, ba ba godisetsa mo kwa-tlhaoñ le mo taoñ ea Morèna, ba ba ruta go tlhökômèla le go utlwa melaō ea gagwè.

Diane 22. 6 ; *Baelesia* 6. 4 ; *Mathaio* 28. 20.

Poco 140. Kgôlaganô e kae mo kolo-becoñ ea banyana ?

Karabō. Banyana, ka e le banyana, ga ba kake ba diha kgôlaganô ea go tshelèla Morèna Yesu Keresete, me ba ba ba lereñ ba diha kgôlaganô ea go ba ruta le go ba thusa go mo tshelèla.

Isaia 8. 16-18.

Poco 141. Bagolo ba ikgolèga yañ mo go kolobetseñ banyana ?

Karabō. Kgōlaganō e badumedi ba e dihañ le Morèna Yesu Keresete ga se go re ba tla kolobetsa bana hèla, me e le go re ba tla ba ruta Lehoko ya Modimo, le mekgwa e e chwanetseñ bana ba òna. Ba ikgolèga go ba ruta mo sekoleñ le mo magaeñ a bōnè.

Deuteronomie 11. 19 ; Moreri 4. 13 ; Diane 29. 15.

Poco 142. A badumedi ba chwanetse go nèla bana ba bōna mo go ba e señ badumedi go re ba godisiwè ke bōnè ?

Karabō. Nya, Go diha yalo ke go nyatsa kgōlaganō e ba e dihileñ le Morèna Yesu Keresete, ke go latlha le go senya bana ka go ba tima thutō, le go ba tsenya mo tseleñ e e sa itseñ Keresete.

Pesalema 127. 3 ; Isaia 38. 19 ; Lefitiko 18. 21.

Kaga Selalèlō

Poco 143. Selalèlō sa Morèna Yesu Keresete ke eñ ?

Karabō. Selalèlō sa Morèna Yesu Keresete ke go abèlwaa senkgwè le senoō,

e le dichupō tsa mmele oa ga Yesu le madi, mo segopocoñ sa losho loa gagwè, me e le gore baabedwi ba thatahalè mo meoeeñ ea bōna ka go kōpañwa naë.

I Bakorintha II. 23-26 ; Baelesia 3. 16-19.

Poco 144. Selalèlō sa Morèna se thailwe leñ le yañ ?

Karabō. Selalèlō sa Morèna se thailwe ka bosigo yoa bohèlō yoa gagwè a le mo nameñ. Yesu a raea barutwa ba gagwè, a re, senkgwè ke mmele oa gagwè o o ba emetseñ, le senwèlō ke kgòlaganò e ncha mo madiñ a gagwè, me a ba raea a re, mogañ ba se yañ, ba se ñwañ, ba mo gopolà ka gôna.

Luke 22. 14-20 ; I Bakorintha II. 24-25.

Poco 145. Morèna Yesu Keresete o mo selaleloñ sa gagwè ka mokgwa o o ntseñ yañ ?

Karabō. Morèna Yesu Keresete o mo selaleloñ eseñ ka mmele oa gagwè le madi, me o gôna ka mōea oa gagwè. Me sebōnalō sa gagwè se ka lemogwa hèla ke meōea ea batho ka thushō ea Mōea o o Boitshèpō.

Mathaio 18. 20 ; I Bakorintha II. 29 ; I Yohane 3. 16.

Poco 146. A badumedi ba chwanetse go ea diphuthegoñ cotlhe tsa Selalèlō.

Karabō. E, badumedi ga baa chwanèla go tlhōkahala mo Selaleloñ, ka e le seshupō se segolo le se se masisi sa boinèlanō yoa ga Keresete le modumedi ; me ha modumedi a setse mo gaè hèla eseñ ka sepè, go shupa ha èna a sa rate go bôna thushō ea go utlwana sentlè le Morèna eo o mo shwetseñ.

Bahebera 10. 24-25; Mathaio 7. 20.

Kaga Dichwanèlō tsa Badumedi

Poco 147. A botlhe ba ba ipitsañ badumedi ke ba ga Yesu Keresete ?

Karabō. Nya, leha go na le batho ba le bantsi ba ba ipitsañ badumedi ke ba ba ratañ Morèna Yesu, ba sepela kaha ditaololoñ tsa gagwè ba ba tla ipolèlwiañ ke Èna ha e le ba gagwè ka mmanete.

Yohane 8. 31-32, le 13. 35; Mathaio 7. 21-23.

Poco 148. Chwanèlō ea badumedi mo go ba ba sa dumeleñ ke go reñ ?

Karabō. Badumedi ba chwanetse go itsise ba ba sa dumeleñ Efangeleo ea Morèna Yesu Keresete, ba ba rapèla

ka tlhōahalō go amogèla poloka ea gagwè, le go ipolèla ha e le balatedi ba gagwè ka go inèla mo kolobecōñ.

Mathaio 28. 19-20; 2 *Bathesalonika* 3. 1; *Bakolosa* 4. 2-4.

Poco 149. Batho ba chwanetse go ipolèla Morèna Yesu Keresete ka ntlhaean?

Karabō Batho ba chwanetse go ipolèla Morèna Yesu ka ntlha ea go bo o rile ba ba mo ipolèlañ o tla ba ipolèla, le ba ba mo itatolañ o tla ba itatola.

Mathaio 10. 32-33; *Ditihō* 4. 12; *Baroma* 10. 9; *Baflepī* 2. 10-11.

Poco 150. Bolekèlō yo bogolo yoa batho mo botshelōñ yono bo chwanetse go na bohe?

Karabō. Bolekèlō yoa batho mo botshelōñ yono bo chwanetse go na go tshela, e le bana ba Modimo, ba rata ba kgatlha òna, ba dihèlana, ba golèla sechwanoñ sa Morèna Yesu, me ka mouō ba o galaletsa.

2 *Bakorintha* 6. 17-18; 1 *Bathesalonika* 4. 1-8; *Baelesia* 4. 1-4; 1 *Petere* 2. 21.

Poco 151. Re chwanetse go tshelèlè-lañ kgalaleco ea Modimo?

Karabō. Ga re ba rona, re bare-

kolodwi ba re rekocolweñ ka madi a a tlhōkègañ a Morèna Yesu Keresete : ke gôna re chwanetseñ go galaletsa Modimo ka mebele ea rona, le ka meōea eoo mebedi, e e leñ eôna ea Modimo.

1 *Bakorintha* 6. 19-20; *Baroma* 12. 1-2; *Bahebra* 13. 15.

Kaga Namishō ea Tumèlō

Poco 152. Mokgwa o mogolo oa go namisa Tumèlō ke ohe ?

Karabō. Mokgwa o mogolo oa go namisa Tumèlō ke go nna badumedi ba amarure, le go ichupa ka motsamaō ha tumèlō ea rona e le e e molemō rure.

Mathaio 5. 16; 1 *Yohane* 1. 7.

Poco 153. A re chwanetse go ntshetsa namishō ea Tumèlō phalalō ?

Karabō. Re chwanetse go ntshetsa namishō ea Tumèlō cotlhe tse re nonohileñ go di ntsha, le dithuō tsa rona, re chwanetse go chwaea bontlha ñwe ea côna e le ea Phalalō.

2 *Pesalema* 116. 12-14; *Malaki* 3. 10; 2 *Bakorintha* 9. 7.

Poco 154. Rona tōta re chwanetse

go dihañ go namisa Tumèlō kwa ntlè ga go ntsha Phalalō ?

Karabō. Re chwanetse go lōpa botlhe go re ba eè tlun̄ ea Thutō, le go bua nabō kaga meōea ea bōnè, me ha ba sa itse go bala re chwanetse go ba balèla Mahoko a a Molemō a Morèna Yesu Keresete.

Yakobo 5. 19-20.

Poco 155. Ha batho botlhe ba dichabachaba ba ka cwa badumedi matshegō a kabō a na ahe mo lehatshiñ ?

Karabō. Ha batho botlhe ba dichabachaba ba ka cwa badumedi ba amarure, go ka khutla tlhabanō, le tshenyō, le boshula boñwe le boñwe : batho ba ka tshela ka bolele yoa malatsi, le kagishō, le letlōtlō, le boitumèlō di ka hitlhèlwa goñwe le goñwe.

Bagalatia 5. 19-24; *Ditihō* 10. 34-36.

Poco 156. Re ka dihañ go thusa go namisiwa ga Tumèlō mo mahatshiñ aotlhe ?

Karabō. Re chwanetse go rapèla ka tlhōahalō ka letsatsi le letsatsi go re Efangeleo ea ga Yesu Keresete e isiwè mo dintlheñ cotlhe tsa lehatshe le go re batho botlhe ba dumèlè mo go èna.

2 Bathesalonika 3. 1; *1 Timotheo* 2. 1-4.

Kaga Botshelō yo bo tlañ

Poco 157. Cholohèlō ea bana ba Modimo kaga botshelō yo bo tlañ ke eñ ?

Karabō. Cholohèlō ea bana ba Modimo kaga botshelō yo bo tlañ, ke gonna le Morèna Yesu Keresete kwa o gôna, le go dihèla Modimo ka bosakhtleñ mo kgalaleloñ ea Legodimo ka boitumélō.

Yohane 14. 2-3; Tito 1. 2; Tshenolō 7. 15.

Poco 158. Mo diloñ cotlhe tsa Lehatshé se segolo ke eñ ?

Karabō. Mo diloñ cotlhe tsa Lehatshé se segolo se se gaisañ cotlhe tse diñwe ke polokègō ea mōea oa motho, gonne motho o tla bo a ka thusiwa eñ leha a ka henya lehatshé yeotlhe me a latlha botshelō yoa gagwè.

Mareko 8. 36-37; 1 Timotheo 6. 6.

Poco 159. Motho o chwanetse go ipatlèla polokègō leñ ?

Karabō. Motho o chwanetse go ipatlèla polokègō gompiyeno, e le lobaka lo lo lebosègañ lo lo molemō, me ga go na opè eo o itseñ ha a tla bōna letsatsi ya ka moshō.

*2 Bakorintha 6. 1-2; Bahebera 4. 7;
Mareko 13. 35-36.*

Boipolèlō yoa Tumèlō

Poco 160. Boipolèlō yoa Ba-ga-Keresete yoa Tumèlō boa reñ ?

Karabō. Boipolèlō yoa Tumèlō yoa ba-ga Keresete ke yo, Kea dumèla mo Modimoñ, Rara le Mothatieotlhe. Kea dumèla mo go Yesu Keresete Morwa Óna eo o tsecweñ a le esi, e le Morèna oa rona, eo o na a ithwalwa ka Mōea o o Boitshèpō, a tsalwa ke Maria oa Kgarebe. O na a bapolwa ka taolō ea ga Pontio Pilate, a shwa, a hitlhwa. Erile ka tsatsi ya boraro a coga mo loshuñ, a tlhatlogèla kwa Legodimon, a nna ha atleñ se segolo sa Modimo, kwa o tla cwañ gōna, a tla go sekisa batshedi le bashwi.

Kea dumela mo Moeñ o o Boitshèpō ; mo boichwareloñ yoa dibe ; mo cogoñ ea bashwi ; le mo botsheloñ yo bo sa khutleñ.